

Olimpijski plamen ponovo u Sarajevu

12/12/2012 09:40 by Administrator

Ovo je veliki događaj za cijelu Bosnu i Hercegovinu, i pored sportske, ovo je velika politička pobjeda, izjavio je za Fenu gradonačelnik Sarajeva Alija Behmen nakon što je 41. Generalna skupština Evropskih olimpijskih komiteta (EOC) u Rimu, Sarajevu i Istočnom Sarajevu dodijelili organizaciju Evropskog zimskog olimpijskog festivala za mlade 2017. godine (EYOWF 2017).

"Bosni i Hercegovini sedaje da organizuje olimpijadu mladih koji su najosjetljiviji dio sportaša. To je poruka da se naša država vidi kao sigurna zemlja, kazao je gradonačelnik Behmen", dodaju također kako će ovaj događaj definitivno donijeti i privredni zamah.

"Gradi se infrastruktura, na novim stazama i u novoizgrađenim objektima na našem olimpijskom gorju održavat će se ako ne svjetski, onda sigurno evropski kupovi i razna prestižna takmičenja. Naravno, mnogo toga ovisit će o sposobnostima ljudi koji će upravljati svim procesima, ali je jako bitno naglasiti da je delegacija BiH u Rim došla sa punom podrškom i Vlade Federacije BiH i Vlade Republike Srpske, što znači da su svi prepoznali razvojnu komponentu, izjavio je Behmen za Fenu, dodaju također kako zaista misli da "nema projekta koji je više ujedinio BiH".

Dakle, u Sarajevu će se drugi put zapaliti olimpijski plamen. Događaj će okupiti oko 1.500 sportista i sportašica iz više od 40 evropskih zemalja članica EOC-a.

Proglašenju i potpisivanju ugovora o organizaciji EYOWF-a 2017. prisustvovala je bosanskohercegovačka delegacija koju su, uz predstavnike Olimpijskog komiteta BiH, predvodili gradonačelnik Sarajeva Behmen i gradonačelnik Istočnog Sarajeva Vinko Radovanović. Generalnoj skupštini se obratio i zahvalio predsjednik Olimpijskog komiteta BiH, Izet Rašić, a Skupštini je predstavljen promotivni materijal kandidature, kao i video prezentacija koja je urađena u produkciji Al Jazeera Balkans.

Prema predloženom programu EYOWF-a, 2017. na našim olimpijskim planinama i u sportskim dvoranama će se održati takmičenja u alpskom skijanju, skijanju na dasci, skijaškom trčanju, biatlonu, umjetničkom i brzom klizanju, te hokeju. Olimpijska infrastruktura korištena 1984. tokom XIV Zimskih olimpijskih igara biće ponovo pripremljena i iskorištena za najveće evropsko olimpijsko takmičenje koje će okupiti veći broj učesnika i učesnica i zemalja nego ZOI '84.

Na pripremi i organizaciji EYOWF-a 2017. godine radiće Organizacijski komitet koji će, uz vodeću ulogu gradova Sarajevo i Istočno Sarajevo, te Olimpijskog komiteta BiH, okupiti i ujediniti napore svih državnih, entitetskih i lokalnih institucija nadležnih za razvoj i promociju sportskih i turističkih potencijala BiH.

Izvor vijesti: klix.ba